

puspe an Surmeir a dar scola. Cugl corp era ella bagn cò, ma cugl cor era ella anavant tigl's unfants an Honduras. Ed igl 2007 è ella turnada puspe an America centrala. Ella veva pero las sias atgnas visiuns. Or dad en spital betg duvro ple, ò ella fatg ena tgesa d'unfants cun igl nom «Yo quiero ser...».

En datgesa per 40 unfants

Oz è la tgesa d'unfants dall'antiora scolasta da Cunter en refugi per 40 unfants. Piglias se dalla veia. Savens cun ena expressiun apatica. Maltractos da corp ed olma. Ed oz èn els unfants privilegias a Honduras. Chels unfants on en tetg, on nutrimaint regular ed angulivo, els on higiena, on scolaiziun ed èn generalmaintg cuntaints. Oz son els reir ed on er la perspectiva da saveir reir anc dumang. Pero vottan els esser accumpagneas anfignen tar lour adolescenza, schiglio è igl prievel grond tgi els turnan anavos ainten la misergia cun tot las sias consequenzas.


Igl sustign da Patricia Scarpatetti è chel dad esser preschainta ple u manc igl antier onn, organisar tot e vurdar tgi tot marscha schi bagn scu pusebel. E schi simpel na seia l'antiera tgossa betg. Pertge en sustign digl stadi na dattigl betg e la criminalitad è omnipreschainta. E sch'ins vot far ensatge, vign savens anc mess crappa ainten veia.

Naturalmaintg tgi igl antier project dovra er sustign finanziel. E chel vign dalla Svizra. Ossa dattigl en cunsegl da fundaziun cun ella sezza scu presidenta e diversas persungas tgi èn responsablas er pigls divers ressorts. E chest cunsegl da fundaziun procurescha per las finanzas.

«Igl mument vaina ena bunga situaziun. Nous vagn quatter fundaziuns tgi sustignan nous mintg'onn cun ena somma pi gronda», dei Patricia Scarpatetti. E vetiers vignan anc donaziuns da privats e contribuziuns tgi vignan rimnadas cun diversas acziuns. Spezialmaintg an Surmeir. Ena part è igl sustign finanziel ed ena part igl sustign material tgi vignan transpurto an containers da taimp an taimp a Honduras. Seia chegl vistgadeira u schiglio roba nizevla.

En ampren premi

La lavour preziosa da Patricia Scarpatetti a Honduras è crudada sen taragn fritgevel. An amprena



A Santa Rosa de Copán duess neir realiso en proxim project cun ena tgesa d'unfants.

lengia per chels unfants tgi on la fovorienscha dad neir recepias ainten la tgesa «Yo quiero ser...». Pero er ordvart da Honduras ins ò piglia notiztga digl angaschamaint spezial dalla donna da Cunter. Chegl an spezial ainten la strètga patria, ma er utro. Ed uscheia è er succedia tgi Patricia Scarpatetti cun igl sies project, survign per l'amprema geda en premi. Doto cun 10 000.– fr. Tgi vign surdo mintga dus onns dad ena uniun dalla bassa. Tge uniun tgi chegl è duess anc betg neir do ancunaschaint. Igl 8 da november è a Turitg la surada da chest premi. Naturalmaintg an preschientscha da Patricia Scarpatetti, blers giasts e las medias. Ed uscheia duess l'antiera tgossa esser ena sorpresa. L'inizianta e manadra dad «Yo quiero ser...» è naturalmaintg fitg cuntainta da chella onour: «Chegl è fitg bel tgi dat er organizaziuns tgi cattan rancunaschientscha per la nossa lavour e per igl noss project. Ia sung fitg leda giudlonder».

Igl nov project

La lavour da Patricia Scarpatetti a Honduras è fitg preziosa, pero mossa er cunfegns. An vista alla gronda misergia dapertot utro ainten la tera e dapertot utro segl mond è «Yo quiero ser...» angal igl ancunaschaint «fav aint igl lai». Ed i dovra adegna puspe nova forza e mutivaziun da star vedlonder a cuntinuar. E chella ò la manadra digl project. E betg angal

chegl: ella painsa perfign ve da novs projects. Ed ord chella vista è igl premi zont bagnnia.

Schi da tge sa tractigl? Cun igls unfants da «Yo quiero ser...» ins vo regularmaintg eneda dus emdas ad onn an vacanzas. Betg pi gliunsch. Angal «a colm», dei Patricia Scarpatetti. A «Santa Rosa de Copán». Chegl è ena vischnanca (28 000 abitants!) 160 km davent da San Pedro Sula. Chest li è sen 1160 m sur mar. E l'ò è en po pi frestg e tuttegn tgod avonda da de per far bogn. Gl'è en po or aint igl verd ed ideal per igls unfants per far en gnoul vacanzas e lippar or digl mintgade.

«Cò dattigl betg unfants dalla veia, ma la povradad è er cò enorma. Uscheia lessans indrizzar er cò ena tgesa d'unfants», declera Patricia Scarpatetti. E sustignia tar chel project ò igl cumegn da Santa Rosa de Copán tgi ò schintgigia tschnitg hectaras taragn per realisar igl project. E pinavant vess la vischnanca segl ot en clima pi sang, miglra instructiun da scola, pi pacs problems socials e la veta fiss pi bungmartgeda.

Detagls tigl project

Igl principal ve digl project fiss dad eriger en betg tgi serva alloura scu tgesa d'unfants. Ins chinta cun ena surfatscha da 700 m². Dasperas tgesa ins faschess cultura da verduras, ena farm da gaglignas, ena tratga da peschs. Pinavant ins less nizigier l'ava dalla plievgia, construeir ena ci-

sterna per l'ava da beber ed alloura er avere divers magasigns per deponer la roba. Essend tgi igl suglegl sclarescha savens e ferm an Honduras, ins nizigess er el per l'energeia solara.

Per igls unfants dessigl dasperas la tgesa en plaz per giuier, en areal da sport. Ed er parcadis duvresigl.

Naturalmaintg tgi chels 10 000.– fr. digl premi tanschan betg per igl antier project. Er schi las cundiziuns per biagier èn a Honduras per blier pi favorevlas. Ed er schi tot ansemen niss construa da maniera fitg simpla. Igl bietg p.ex. an stil colonial.

E tenor calculaziuns approximativas custess igl antier project 2 206 400.– fr lempiras. An muneida svizra fissan chegl 110 320.– fr.

Cultura dalla veta

«Nous savagn tgi vagn gio grondas obligaziuns ed i dat tgossas tgi on prioritad. Deplorablaintg rigia a Honduras la cultura dalla mort e nous cartagn tgi Dia ans ò clamo per transfurmar chella an la cultura dalla veta. Igl thermometer dalla societad è la famiglia. Ed a chella vogl fitg mal. Nous stuagn promover projects per migliurar la veta, noua tgi en unfant so er reir ed esser ventirevel, noua tgi gl'è da veir scu tgi igls unfants son triumfar ainten la veta...Chegl vala duple tgi mintga premi», resumeschan igls responsabels ansemen cun Patricia Scarpatetti lour missiun e fegnameira.